

Studiantenan di Colegio Arubano no kier pa meneer Alfredo Capelo bay

E ta haya cu Rectorado mester baha di nan trono y comunica cu studiantenan

ORANJESTAD (AAN): Studiantenan di Colegio Arubano diamars mainta a bay den un protesta pa e maneho nobo cu Rectorado di Colegio Arubano kier introduci.

A combersa cu un estudiante, Robert Goilo, kende a splica cu nan a bay den un protest pa motibo cu meneer Capelo a dicidi di tuma su retiro door di mal comunicacion cu e rector. Ta papia di un producto di calidad unda cu e mucha muhenan no mag bisti short mas, pero e mucha hombernan si ta worde permiti pa bini school na short. Otro reglanan ta cu no mag charge telefon mas na school, no mag scucha telefon, ni scucha musica den pauze, etc. E musica den pauze ta algo cu a cuminsa aña pasa, el a splica, pa motibo cu un plenchi keto ta hopi laaf y kier a trece algo



di ambiente den pauze.

E studiantenan cu a protesta tabata kier pa sigui pone e musica den pauze y tambe nan kier meneer Capelo back na school, kende ta motiva e studiantenan. "Sin musica e ta bira saai y tin un otro area di school unda cu e musica no ta worde scucha y e muchanan, cu kier, por studia. Of nan por haci uzo di lokaalnan cu ta bashi den pauze pa siña," e hoben a duna di conoce.

A combersa tambe cu Meneer Capelo cu a splica cu su

retiro tin diferente motibo. Na prome luga, su edad ta subiendo y ta bira tempo pa bay pa haci algo otro. Esaki apesar cu Colegio Arubano a bira su di dos cas. Na di dos luga, como cu e ta sintiendo cu e ta hayando "tegenwerking" pa algun cos cu e kier haci, ta dune mas gana di bay. Mas ainda cu e no ta hayando cooperacion pa haci algun cos cu ta pa e propio studiantenan. "E ora mas lihe bo ta dicidi pa bay. Diabierna mi a tuma e decision cu te aki mi ta yega. Mi ta bay," el a splica. Su filosofia y loke e ta bisa e studiantenan semper ta cu e school ta nan di dos cas y nan mester sinti nan mes comodo eyan. El a haya fastioso cu tin algun regla ta worde poni sin cu ta consulta cu e studiantenan y ta spera cu nan ta simplemente bisa "ta bon".

E ta sinti cu tin un falta di comunicacion entre Rectorado y docentenan, cu tin un grupo hopi rabia, y si tin mas comunicacion cu nan y cu e studiantenan, tur problema lo worde solucioná.

Pa loke ta e regla cu mester papia Hulandes, e no ta mira problema den esaki ya cu di e forma aki e studiantenan por compronde miho e terminologianan, ya cu na final e examennan ta na Hulandes. E ta algo normal y no mester worde discuti riba dje. Pero den pauze e ta kere cu mester por papia Papiamento, expresa bo mes den bo idioma materno. Pa loke ta musica, e studiantenan mes ta pone y solamente den pauze y e no ta stroba nan di studia. E ta kere cu si e ta duro, por simplemente pidi pa baha e volumen. Normalmente e much-

anan tin nan headphone bisti den pauze y no ta comunica cu otro. Pero na momento cu a introduci musica den pauze, nan a kita headphone pa scucha y tin mas interaccion entre studiantenan. Pues, e ta bisa, e tin su parti positivo. "E no ta haci daño na ningun hende," Capelo a bisa.

Na final, el a bisa cu tabata suficiente, y cu e tempo di dunamento di les awor a keda tras di lomba. E ta haya esaki hopi lamentable, pasobra semper e tabata comunica bon cu e estudiante pa tende cual ta nan deseonan y esaki ta algo cu rectorado no ta haci. "Nan ta sinta riba un trono sin comunicacion cu e studiantenan, encunto kico ta nan problemanan. Baha for di trono y papia cu nan lo yuda hopi," el a termina bisando.